



Cumünanza da taxaziuns d'impostas Zernez - Val Müstair

In ün inscunter tanter ils duos cumüns as vaiva discutà sur da la pussibilità da s'abinar sur d'üna cumünanza da taxaziun d'impostas tanter ils duos cumüns. Quista es uossa preparada e la cunvegna es avantman. Pel Cumün da Val Müstair vaja impustüt per mantgnair üna piazza da lavur. La cunvegna regla la gestiun, drets e dovairs da quista cumünanza. La suprastanza cumünala ha approvà la cunvegna ed uschè eir la collavuraziun culs vaschins da la Val Müstair.

Deliberaziun dal preventiv 2017 a man da la RC dals 2 december 2016

La suprastanza cumünala ha surlavurà il preventiv dal quint da success e dal quint d'investiziun per l'on da gestiun 2017 ed approvà tals a man da l'approvaziun tras la radunanza cumünala chi ha lö principi december.

Recuors da taxas cumünalas 2016

In seguit a la facturaziun da las taxas cumünalas per l'on 2016 (aua, aua suos-cha ed immundizchas) ha la suprastanza cumünala stuvü trattar e decider sur da 5 recuors da taxas.

Pè d'impostas cumünalas per l'on 2017

Per l'on 2017 vout la suprastanza cumünala propuoner a la radunanza cumünala da laschar il pè d'impostas pro 84% dal pè d'impostas chantunal.

Sistem da gestiun, survagliaza, controlla ed alarmaziun per tuot ils indrizs tecnics cumünals

Il cumün posseda svespassa 30 provedimaints, indrizs ed implants tecnics chi han hoz (per part) fingià üna colliaziun a distanza cun l'üna o l'otra persuna, saja quai sül sectur da l'alarmaziun, da la survagliaza, da la gestiun obain da controlla. Per exaimpel sun quai il provedimaint central da chalur, ils indrizs i'l bogn da famiglia (ventilaziun, aua da nodar, sistem da chascha) obain las sarineras o il glatsch artificial. Fingià daspö ons as tschercha soluziuns per ramassar ils singuls systems, per gronda part adüna d'oters producents/gestiunaders, sün ün unic sistem central.

Il müdamaint sforzà tras la Swisscom da la telefonia analoga/ISDN sün la telefonia digitala pretenda da far adattamaints pro divers indrizs/implants cumünals.

Ün büro perit es gnü incumbenzà da tour sù las ideas e da preparar ün rapport da proget cun üna calculaziun da cuosts previsibels pel proget. I's vezza fich gronds avantags, ma eir la respunsabilità dal cumün invers la populaziun chi pretenda ota qualità illas gestiuns cumünalas (provedimaints d'aua, d'aua suos-cha, bogn da famiglia, glatsch artificial, provedimaint central da chalur etc.).

Il proget chi'd es previs d'instradar in üna prüma fasa principala i'l 2017 e chi ha lura il böt d'agiundscher cuntinuadamaing cun indrizs/implants i'ls ons seguaints, cuntegna ils seguaints elemaints tenor rapport e calculaziun da cuosts manzunà:

Ils cuosts unics pel 2017 sun calculats cun 125'000 francs ed ils cuosts annuals sün 3'000 francs per on. Il böt principal da quist proget innovativ e complex es quel da s-chaffir üna survista cumplessiva sur dals indrizs/implants e da tils masinar, gestir, controllar e survagliar sün üna plattafuorma unica, digitala. Quist drive lura las portas per administrar ün sistem d'alarmaziun e da piket structurà ed organisà. Uschè as po spargnar cuosts d'investiziuns e da las gestiuns d'urant ils prossems decennis, e quai in tuot las gestiuns cumünalas.

La suprastanza es persvasa da la necessità dal proget e til gnarà ad integrar i'l preventiv d'investiziuns 2017.

Nouva sarinera Brail - surdatta da lavurs

L'incumbenza da lovalplattinas per la fabrica da la nouva sarinera a Brail ha pudü gnir surdatta a la firma Tschenett Ofen Platten GmbH a Müstair.

Val Raschitsch-Zernez - correcziun via chantunala

Davo la fabrica da la correcziun da la via chantunala in vicinanza da Chalcheras/Mantè ha l'uffizi chantunal fat giò quint cul barat da terrain chi s'ha dovrà per fabricar il trottuar in Mantè. La suprastanza cumünala ha approvà il credit necessari per la cumpra dal terrain.

Crap chi periclitoscha la via d'alp Grialetsch - resultat final

Il geolog incumbenzà ha perseguità uossa daspö bundant ün on, cun dar periodicamaing rapport al cumün sur dal privel da quist crap (grip) güst suot la via chantunala dal Pass dal Flüela. Tenor il rapport final s'ha serrada darcheu la sfessa constatada da prümvavaira, uschè chi's po ir our d'ün effet da temperatura. Tenor quistas retscherschas e la survagliaza dal geolog para cha'l crap nun es ün privel insolit per la via da Grialetsch, v.d. chi nu dà suot ils puncts da vista actuals ingüens privels insolits/surplü chi van oura da quist grip, co i'ls oters lös sün territori cumünal. Uschè ha la suprastanza cumünala pudü serrar giò quist cas, sainza stuvair trar masüras da sgürezza.

Termins 2017

L'agenda da termins pel 2017 es cuntshainta. D'urant il 2017 as fa quint cun duos fin quatter radunanzas cumünalas, cun 16 sezzüdas da la suprastanza cumünala e cun 26 sezzüdas da la direcziun operativa. Las datas da las radunanzas cumünalas e da las sezzüdas da suprastanza vegna publicadas sülla pagina d'internet dal cumün.